

20. januar 2022

Inatsisartut suleriaasianni § 37 imm. 1 naapertorlugu Naalakkersuisunut apeqqut imaattoq matumuuna saqqummiuppara:

Naalakkersuisunut apeqqut:

1. Saviminilerinermik ilinniarfiup Sisimiunut nuunneqarnissaanik siusinnerusukkut aalajangersimaneq maanna Naalakkersuisunit unitsinneqarsimaneranut suna pissutaava?
2. Titartaasartunik/siunnersortinik neqeroortitsisoqareernerata kingorna siunnersortinit suliarineqarnissaa qanoq ingerlariaqqinnikuuva?
3. Titartaasartunik/siunnersortinik neqeroortitsisoqarneranut atatillugu maannamut qanoq annertutigisut aningaasartuutaareerpat?
4. Saviminilerinermik ilinniarfiup qanoq pineqarnissaa Naalakkersuisut qaqugu Inatsisartunut innuttaasunullu paasissutissiissutigissavaat?
5. Naalakkersuisut allanik paasissutissaasinnaasunik peqarpat?

(Inatsisartunut ilaasortaq Erik Jensen, Siumut)

Tunngavilersuut:

Sermitsiap nittartagaani ulloq 27. marts 2021 atuarneqarsinnaavoq Saviminilerinermik ilinniarfiup nuunneqarnissaanut titartaasartut kikkut toqqarneqarsimanersut aammalu takuneqarsinnaalluni siunnersuutaasoq Sisimiuni Sanaartornermut ilinniarfimmuut qanoq tulluarsarneqarsimanersoq.

Naalakkersuisoq Peter Olsen ulloq 6. Oktober 2021 nal. 10.04:25 kiisalu malitseqartitsilluni nal. 10.06:58 Inatsisartut oqaluttarfiani apeqqarissaarneqarnermini neriorsuutini maannamut eqquutsissimangisani sumummita killippaa? Naalakkersuisoq Peter Olsen ilaatigut imatut oqarmat *“Savimminnilerinermik ilinniarfimmuut tunngatillugu uanga Naalakkersuisoqarfinni akisussaaffigigakku taamaattumik pisortaqarfiga piumaffiginikuuvara, piaartumik Naalakkersuisunut qaqqinneqarnissaa pillugu suliniuteqaqqullugu, taamaattumik naatsorsuutigaara taanna tassunga apeqqummut tunngasoq Naalakkersuisuni qanittukkunni taanna suliariumaaripput – TAANNA NERORSUUTIGISAVARA”*

Maannamut qaammatit qulingiluat ingerlasimalereerput aammalu oktoberip arfernaniit maannamut qaammatit sisamangulersuni suliap killiffianik innuttaasut sulii oqaluttuunneqaratik taamaallaallu tusakkat tutsuiginarlut aallaavigalugit suliap Naalakkersuisunit unitsinneqarsimaneranik tusaamasaqarluta.

Naalakkersuisup kinguarsaanerminut aammalu utoqqatsissutissarsioqattaarneranut neriorsuutiminillu piviusunngortitsisinnaanginneranut atorfilittaminiit aqunneqarnera uppersarsinnaavarput. Taamaattumik pisortatigoortumik Inatsisartut innuttaasullu salloqittarneqarsimanerat aammalu eqqortumik paasitinneqarnissaat kissaatigalugu qulaani apeqqutima ullut qulit qaangiutsinnagit akineqarnissaat piumasaraara.